

Samostalna zastupnica - Elza Gaković

Sarajevo, 10.02.2026. godine

ZA:

Vlada Kantona Sarajevo

Ministarstvo unutrašnjih poslova Kantona Sarajevo

Ministarstvo za odgoj i obrazovanje Kantona Sarajevo

Ministarstvo za rad, socijalnu politiku, raseljena lica i izbjeglice Kantona Sarajevo

Kantonalna uprava za inspekcijske poslove

U skladu sa članom 106. i 213. Poslovnika o Skupštine Kantona Sarajevo, dostavljam:

INICIJATIVU

Tražim da nadležne institucije Kantona Sarajevo hitno i bez ikakvog odlaganja ispitaju sve navode o psihičkom i fizičkom zlostavljanju četverogodišnjeg djeteta u privatnoj predškolskoj ustanovi na području Kantona Sarajevo, o čemu su javnost i institucije upoznate putem medijskih izvještaja od 10. februara 2026. godine.

Tražim:

Hitno izuzimanje i osiguranje svih video-snimaka iz predmetne predškolske ustanove, uz zabranu njihovog brisanja, izmjene ili prikrivanja, te njihovo stavljanje na raspolaganje nadležnim organima.

Da Ministarstvo za odgoj i obrazovanje KS, u saradnji s inspekcijskim organima, odmah izvrši vanredni inspekcijski nadzor nad radom navedene ustanove, uključujući:

zakonitost rada,

primjenu pedagoških standarda,

stručnu osposobljenost i odgovornost zaposlenih.

Da se nadležnim odgajateljima/vaspitačima koji se dovode u vezu s navedenim događajem privremeno obustavi rad s djecom do okončanja postupaka, u skladu sa zakonom i principom zaštite najboljeg interesa djeteta.

Da Tužilaštvo Kantona Sarajevo i MUP KS bez odlaganja provedu sve istražne radnje radi utvrđivanja postojanja elemenata krivičnih djela, posebno onih koja se odnose na:

zlostavljanje i zanemarivanje djeteta,

povredu prava djeteta,

nesavjestan rad u službi.

Da se Centar za socijalni rad uključi u pružanje stručne i dugoročne psihosocijalne podrške djetetu i porodici, ali i ostaloj djeci koja su bila izložena ili svjedočila navodnim događajima.

Da Vlada Kantona Sarajevo razmotri potrebu pooštavanja nadzora nad privatnim predškolskim ustanovama, kao i izmjene propisa kojima bi se spriječilo da se ovakvi slučajevi ikada ponove.

Obrazloženje

Navodi koji su dospjeli u javnost ukazuju na moguće teško i sistematsko psihičko, kao i fizičko zlostavljanje djeteta, uz elemente ponižavanja, prisiljavanja druge djece na učestvovanje u vrijeđanju, te ozbiljne povrede dostojanstva i mentalnog zdravlja djeteta.

Ukoliko se ovi navodi potvrde, radi se o najtežem mogućem kršenju prava djeteta, suprotnom Ustavu, zakonima Federacije BiH i Kantona Sarajevo, Konvenciji o pravima djeteta, kao i svim pedagoškim i etičkim standardima.

Djeca, naročito u predškolskom uzrastu, ne mogu se sama zaštititi, zbog čega je odgovornost države i njenih institucija apsolutna. Svaki pokušaj odugovlačenja, relativizacije ili zataškavanja ovakvih slučajeva predstavlja dodatnu povredu povjerenja javnosti i direktnu opasnost po sigurnost djece.

Zbog svega navedenog, zahtijevam da se ovaj postupak provede po hitnom postupku.